

## EXERCICIOS DE AUTOAVALIACIÓN

### I: Preguntas do tema

**1. Noriega Varela e Ramón Cabanillas. Obras representativas e características definitorias da súa escrita.**

**2. Os movementos de vangarda. Características, autores e obras.**

**3. A xeración Nós. Características, autores e obras.**

### SOLUCIÓN:

1. A produción literaria de A. Noriega V. e R. Cabanillas sitúase no período de entre os séculos XIX e XX e é unha produción case exclusivamente lírica. Esta produción poética caracterízase pola forte influencia dos tres principais poetas do Rexurdimento seguindo unha estética situada entre o Romanticismo, xa pasado de moda, e o Realismo costumista. Poderíase falar de dúas escolas poéticas: a tradicionalista e a renovadora.

Seguiron a escola tradicionalista aqueles autores que rexeitaban as influencias de literaturas alleas, como é o caso de Xosé Crecente Vega (1896-1948), Gonzalo López Abente (1879-1963), e sobre todos está Antonio Noriega Varela (Mondoñedo, 1869-Viveiro, 1947). A obra de Noriega está recollida nun único volume, chamado a partir da 3ª edición *Do ermo* (1926, Montañesas). Esta obra inclúe dous tipos de poemas: uns costumistas, que seguen a liña realista de finais do S. XIX, e outros cheos de lirismo da natureza que nos lembran a San Francisco de Asís. Nesta poesía da natureza nótase a influencia de poetas portugueses como Antero de Quental, Guerra Junqueiro e Teixeira de Pascoas, entre outros.

A escola renovadora séguena autores que, sen rexeitar a poesía do Rexurdimento, non renuncian a actualizar os temas e formas, adoptando modelos chegados de fóra. O seu máximo representante foi Ramón Cabanillas Enríquez (Cambados, 1876-1959). A obra de Cabanillas ocupa dous grandes períodos: antes da guerra (1913-1927), e despois da guerra (1949-1959). Ademais, Cabanillas cultivou diversos xéneros: lírica, narrativa, teatro.

En canto á súa poesía lírica publicou antes da guerra *No desterro* (1913), *Vento mareiro* (1915) e *Da terra asoballada* (1917), libros nos que nos atopamos con tres grandes liñas temáticas: intimista, cívica e costumista. Despois da guerra volveu Cabanillas publicar poesía lírica: *Da miña zanfona* (1954), *Samos* (1958) e *Versos de alleas terras e tempos idos* (1955).

A produción de poesía narrativa inclúe *O bendito San Amaro* (1925), *Na noite estrelecida* (1926), e *Camiños no tempo* (1949), que é unha recompilación da súa poesía narrativa.

A poesía de Cabanillas caracterízase polo intento de conciliar diversas influencias. El busca o mellor para a súa poesía, veña de onde veña.

Ademais Cabanillas cultivou o teatro en *A man da Santiña* (1921) e a prosa.

2. Denominamos vangardas a un conxunto de movementos que, durante o primeiro

terzo do século XX, rexeitaron a concepción clásica da arte como imitación da realidade e buscaron novas formas de expresión artística baseadas na interpretación, descomposición ou recreación desa mesma realidade.

Estes movementos caracterizáronse polo espírito rebelde e a defensa da liberdade creadora. As vangardas actuaron sobre as diversas parcelas artísticas.

Entre os máis importantes movementos vangardistas encóntranse: o futurismo (canta ao progreso técnico), o cubismo (propón a descomposición da realidade en elementos), o dadaísmo (busca no caos o nacemento de novas realidades), o imaxinismo, creacionismo e ultraísmo (buscan reflectir a realidade a través de imaxes) e o surrealismo (trata de conciliar o mundo dos sonhos e da psicanálise co marxismo).

En Galicia o proceso de aproximación ás vangardas líderano as Irmandades da Fala, e unha serie de revistas dan a coñecer a poesía vangardista. Os movementos vangardistas galegos máis típicos foron o hilozoísmo, o neotrobadorismo e o creacionismo.

O hilozoísmo cultiva unha poesía paisaxística, inspirada na de Noriega, e ten como máximo representante a Amado Carballo, que escribiu *Maliaxe* (prosa), *Os probes de Deus* (prosa), *Proel* (verso) e *O Galo* (verso).

O neotrobadorismo é unha poesía que recupera as formas medievais que combina con imaxes vangardistas. Representan esta tendencia Fermín Bouza Brey (*Nao senlleira*, 1933), Álvaro Cunqueiro (*Cantiga nova que se chama Riveira*, *Dona do corpo delgado*) e Xosé M<sup>a</sup>. Álvarez Blázquez (*Cancioneiro de Monfero*, 1953) e outros.

O creacionismo, que procura reflectir a realidade a través de imaxes orixinais e atrevidas, ten como máximo representante a Manuel Antonio Pérez Sánchez, autor de *De catro a catro*, *Con anacos do meu interior*, *Foulas*, *Sempre e máis despois* e *Viladomar*.

**3. A xeración Nós** ten a súa orixe no Grupo Nós (Cenáculo Ourensán), que xorde en Ourense coa escisión das Irmandades da Fala (o Grupo Nós quedará constituído pola facción culturalista). Forman o grupo Risco, Otero e López Cuevillas. A eles unírase máis tarde Castelao, mesmo podemos incluír no grupo a Dieste.

Os homes desta xeración, de orixe social acomodada, acadaron unha sólida formación cultural e excelente preparación académica. Primeiramente viviron de costas á cultura galega e logo (cara a 1918) convértense ao galeguismo. Foi por isto que andaron metidos en política. Nun primeiro momento interesáronse pola cultura europea, os mundos exóticos e os temas esotéricos. As razóns do cambio atópanse no horror que lles produciu a guerra do 14 e o perigo que intuiron na Revolución Rusa do 17. Pero a súa evolución non foi só esa, tamén pasaron do individualismo ao traballo en común.

Como órgano de difusión das súas ideas e traballos, utilizaron a revista *Nós*, fundada por Risco en 1920 e que, despois de moitos atrancos e dificultades, desaparece en 1936.

Os escritores do grupo asumiron a tarefa de elaborar unha literatura galega de prestixio, seguindo os modelos da literatura mundial de principios do século XX.

Son os autores máis importantes e as obras máis significativas os seguintes:

Risco. Natural de Ourense licenciase en Maxisterio despois de iniciar Dereito. Na súa produción distinguimos tres etapas: a) De formación (revista *La Centuria*); b) Galeguista (incorpórase ás Irmandades e colabora en *A Nosa Terra*. Participa en

política e publica Teoría do Nacionalismo Galego); c) De superación do galeguismo (escribe en castelán). Entre as súas obras debemos salientar: Do caso que lle aconteceu ao doutor Alveiros (relato curto de 1919), O lobo da xente (lenda popular de 1925), A trabe de ouro e a trabe de alquitrán (lenda popular de 1925), A coutada (novela de 1926), Os europeos en Abrantes (novela de 1927), O porco de pé (novela de 1928), O bufón de el-rei (drama de 1928). Tamén convén salientar os ensaios Nós, os inadaptados, Teoría do Nacionalismo Galego e Mitteleuropa.

Otero. Natural tamén de Ourense, nace no mesmo edificio que Risco e comparte con el infancia e xogos. Licenciouse en Dereito e doutorouse en Xeografía e Historia. Ao igual que Risco exerceu como profesor. Entre as súas obras imos destacar: os relatos curtos Pantelas, home libre (1925), O purgatorio de D. Ramiro (1926), e Escrito na néboa (1927); o drama A lagarada (1929), a novela Arredor de si (1930) e a triloxía narrativa Os camiños da vida (1928). Tamén escribiu ensaio e poesía.

Cuevillas. Natural de Ourense coma os anteriores escribiu o ensaio Dos nosos tempos.

Castelao. Natural de Rianxo, estudou medicina, pero apenas exerceu como médico. Preferiu a Administración e exerceu como artista e político. Cultivou moi variados xéneros destacando entre a súa obra: os álbums Galicia mártir, Atila en Galicia e Milicianos; a recompilación de ensaios Sempre en Galiza; o relato curto Un ollo de vidro (1922); a “cousa” Cousas (1926-1929); a colección de contos Retrincos (1934); a novela Os dous de sempre (1934) e a obra de teatro Os vellos non deben de namorarse (1941).

Dieste. Tamén natural de Rianxo, como Castelao, foi autodidacta, a diferenza dos demais compoñentes da xeración. As obras máis salientables de Dieste son: a colección de contos Dos arquivos do trasno (1926) e o drama A fiestra valdeira (1927).

A Guerra Civil dividiu o grupo porque cada un adoptou un camiño diferente.

## II: Comentario de texto

### Texto 1:

1. Le estas estrofas dun poema de Bouza Brey e comenta como se mesturan nelas temas propios do hiloísmo e do neotrobadorismo. Comenta as formas non normativas.

*Naquel biduído dos bidos louzanos  
o páxaro Sol non pía seus raios,  
e morre de amor.*

*Naquel biduído dos lanzales bidos  
o páxaro Sol non criba seus píos  
e morre de amor.*

*Nao senlleira*

2. Analiza nestas estrofas recursos estilísticos propios dos Cancioneiros medievais: refrán, paralelismo, anáfora, etc.

3. Analiza nestas estrofas recursos propios do hiloísmo: personificación, animación,

imaxes arriscadas, etc.

4. Cita revistas que espallasen os vangardismos en Galicia.

### **SOLUCIÓN:**

1. Tema propio do hilozoísmo é a presentación dunha paisaxe rural de gran fermosura. Tema propio da poesía dos *Cancioneiros* é o do amor sen correspondencia.

2. Temos o emprego do paralelismo e o refrán. Cómpre salientar tamén a derivación bido-biduído, hipérboles coma a morte por amor e o emprego de palabras habituais nos *Cancioneiros*.

3. Como recurso propio do hilozoísmo os elementos da natureza, coma o sol, aparecen animados ou personificados: así, o sol *morre de amor*.

4. *A Nosa Terra* e *Nós* aínda que non son revistas estritamente poéticas acollen nas súas páxinas poesía vangardista ou críticas e informacións sobre estas escolas. Revistas poéticas son *Alfar*, *Ronsel*, *Cristal*, *Yunque*, *Resol*.

### **Texto 2:**

1. Le o texto que segue e relaciónao coa novela á que pertence. Salienta a función que Otero Pedrayo lle asigna aos fidalgos e relaciónao co comportamento de Paio, o mozo fidalgo do texto.

*Floreecía a casa, as terras, as esperanzas. A parroquia de Trasouto lucía entre as compañeiras da bocarribeira pola limpa influencia do médico, [o fidalgo Paio Soutelo]. Xa estaban orgullosos del... Xa mediaba a noite, cando chamaron ó portón... O Estevo chegou a modiño á alcoba do médico para non esperta-las señoras. Era preciso ir ó afastado lugar de Medelo: o señor Vicente da Regueiriña estaba a morrer. Inda polo serán fora coas vacas ó monte. O Paio vestiuse e pasiño a paso foi bicar as frontes da nai e da tía Ramona. Cando en compañía do fillo do doente e do Estevo, que levaba o farol, cruzaba a penascada do Vedral, o médico levaba unha cántiga nos beizos. ¡TERRA A NOSA!*

OTERO PEDRAYO: *Os camiños da vida. O estudante*

2. Comenta a caracterización que fai Otero do protagonista do texto.

3. O texto é remate de *Os camiños da vida*. ¿Por que remata coa expresión?: ¡TERRA A NOSA!

4. Pode ser Paio un trasunto autobiográfico dos propios membros da xeración Nós?

5. Relaciona a Paio co D. Celidonio de *O porco de pé*.

### **SOLUCIÓN:**

1. Dividida en tres partes relata a decadencia da fidalguía. Porén, desa fidalguía emerxe *Paio*, médico, que dedicará a súa vida aos labregos da súa comarca, na función de modelo e reitores morais do pobo que Otero asignaba aos fidalgos.

2. É un personaxe *plano*, pois só presenta características positivas.

3. O sentimento da terra era fundamental para a Xeración Nós.



4. Evidentemente. Eles pretendían ser os descendentes dos vellos fidalgos, instruídos e formados, que se converterían en modelos e guías espirituais do pobo galego na tarefa de recuperar a galeguidade.
5. D. Celidonio é a antítese de Paio. Representa o burgués enriquecido e individualista, separado do pobo, que unicamente valora o progreso material e non comprende a galeguidade.